

Die Eerste Brief van
IOANNE

Outeur : **Ioanne.**
Aan : **Aan Eerste Eeuse**
Gelowiges in die algemeen
wat deur die Valse
leringe geraak word.
Rede : **Versekering aan die**
gelowiges rondom die
insluiting van die Valse
leerstellings.
Geskryf in : **Jerusalem**
Geskryf tussen : **65-67 CE**

Voorwoord.

In hierdie brief is daar blyke van kommer oor die feit dat gelowiges in die war gebring word deur dwaaleraars wat beweer dat die Seun van Aleim nie werklik mens geword het en dat IESO dus nie die Gesalfde is nie. Wie dit glo, kan nie in gemeenskap met Aleim en met IESO die Gesalfde leef nie en kan ook nie in die regte verhouding tot medegelowiges staan nie. Die Gesalfde IESO is die Seun van Aleim wat mens geword het. Wie dit nie bely nie, is 'n antigesalde. Aleim is lig en Aleim is liefde. Wie aan Aleim behoort, lewe in die liefde. Dit is die voorwaarde vir gemeenskap met Aleim en met die medegelowiges.

Die Woord het in die Vlees Verskyn.

1 Wat van die begin af was, wat ons gehoor het, wat ons met ons oë gesien het, wat ons aanskou het en ons hande getas het aangaande die Woord van die lewe—
2 en die lewe is geopenbaar, en ons het dit gesien, en ons getuig en verkondig aan julle die ewige lewe wat by die Vader was en aan ons geopenbaar is—
3 wat ons gesien en gehoor het, verkondig ons aan julle, sodat julle ook gemeenskap met ons kan hê; en ons gemeenskap is met die Vader en met Sy Seun, IESO die Gesalfde.
4 En ons skrywe hierdie dinge aan julle, sodat julle blydskap volkome kan wees.

Gemeenskap met die Vader en Sy Seun.

5 En dit is die verkondiging wat ons van Hom gehoor het en aan julle verkondig: Aleim is Lig, en geen duisternis is in Hom nie.
6 As ons sê dat ons met Hom gemeenskap het en in die duisternis wandel, dan lieg ons en doen nie die waarheid nie.
7 Maar as ons in die Lig wandel soos Hy in die Lig is, dan het ons gemeenskap met mekaar; en die bloed van IESO die Gesalfde, Sy Seun, reinig ons van alle sonde.

Die Belydenis van Sonde en die Vergifnis.

8 As ons sê dat ons geen sonde het nie, mislei ons onself en die waarheid is nie in ons nie.

9 As ons ons sondes bely, Hy is getrou en

regverdig om ons die sondes te vergewe en ons van alle ongeregtigheid te reinig.

Psalms. 17:5. LXX MT

10 As ons sê dat ons nie gesondig het nie, dan maak ons Hom tot 'n leuenaar en is Sy Woord nie in ons nie.

Die Toets om die Gesalfde te ken.

2 My kinders, ek skryf hierdie dinge aan julle, dat julle nie moet sondig nie; en as iemand gesondig het, ons het 'n Voorspraak by die Vader, IESO die Gesalfde, die Regverdige.
2 En Hy is 'n versoening vir ons sondes, en nie alleen vir ons s'n nie, maar ook vir dié van die hele wêreld.

Onderhouding van die Gebooie. Broeder Liefde. Verloëning van die Wêreld.

3 En hieraan weet ons dat ons Hom ken: as ons Sy gebooie bewaar.
4 Hy wat sê: Ek ken Hom, en Sy gebooie nie bewaar nie, is 'n leuenaar en in hom is die Waarheid nie.
5 Maar elkeen wat Sy Woord bewaar, in hom het die liefde van Aleim waarlik volmaak geword. Hieraan weet ons dat ons in Hom is.
6 Hy wat sê dat hy in Hom bly, behoort self ook so te wandel soos Hy gewandel het.
7 Broeders, dit is geen nuwe gebod wat ek aan julle skryf nie, maar 'n ou gebod wat julle van die begin af gehad het. Die ou gebod is die Woord wat julle van die begin af gehoor het.
8 En tog skryf ek aan julle 'n nuwe gebod wat waar is in Hom en in julle, want die duisternis gaan verby en die waaragtige Lig skyn alreeds.
9 Hy wat sê dat hy in die Lig is en sy broeder haat, is in die duisternis tot nou toe.
10 Wie sy broeder liefhet, bly in die Lig, en in hom is geen oorsaak van struikeling nie.
11 Maar hy wat sy broeder haat, is in die duisternis en wandel in die duisternis en weet nie waarheen hy gaan nie, omdat die duisternis sy oë verblind het.

12 Ek skryf aan julle, my kinders, omdat die sondes julle vergewe is om Sy Naam ontwil.
13 Ek skryf aan julle, vaders, omdat julle Hom ken wat van die begin af is. Ek skryf aan julle, jongmanne, omdat julle die bese oorwin het. Ek skryf aan julle, kinders, omdat julle die Vader ken.
14 Ek het aan julle geskrywe, vaders, omdat julle Hom ken wat van die begin af is. Ek het aan julle geskrywe, jongmanne, omdat julle sterk is en die Woord van Aleim in julle bly en julle die bese oorwin het.

15 Moenie die wêreld liefhê of die dinge wat in die wêreld is

nie. As iemand die wêreld liefhet, dan is die liefde van die Vader nie in hom nie.

16 Want alles wat in die wêreld is—die begeerlikheid van die vlees en die begeerlikheid van die oë en die grootsheid van die lewe—is nie uit die Vader nie, maar is uit die wêreld.

17 En die wêreld gaan verby en sy begeerlikheid, maar hy wat die wil van Aleim doen, bly vir ewig.

Die antigesalfde.

18 Kinders, dit is die laaste uur; en soos julle gehoor het dat die antigesalfde kom, bestaan daar ook nou baie antigesalfdes, waaruit ons weet dat dit die laaste uur is.

19 Hulle het van ons uitgegaan, maar hulle was nie van ons nie; want as hulle van ons was, sou hulle by ons gebly het; maar dit moes aan die lig kom dat hulle nie almal van ons is nie.

20 En julle het die salwing van die Heilige en weet alles.

21 Ek het nie aan julle geskrywe omdat julle die Waarheid nie ken nie, maar omdat julle dit ken en omdat geen leuen uit die Waarheid is nie.

22 Wie is die leuenaar, behalwe hy wat ontken dat IESO die Gesalfde is? Dit is die antigesalfde wat die Vader en die Seun loën.

23 Elkeen wat die Seun loën, het ook nie die Vader nie.

24 Wat julle dan van die begin af gehoor het, laat dit in julle bly. As in julle bly wat julle van die begin af gehoor het, dan sal julle ook in die Seun en in die Vader bly.

25 En dit is die belofte wat Hy ons beloof het, naamlik die ewige lewe.

26 Dit het ek aan julle geskrywe met betrekking tot die wat julle mislei.

27 En die salwing wat julle van Hom ontvang het, bly in julle, en julle het nie nodig dat iemand julle leer nie; maar soos dieselfde salwing julle aangaande alles leer, so is dit ook waar en geen leuen nie; en soos dié julle geleer het, so moet julle in Hom bly.

28 En nou, my kinders, bly in Hom, sodat ons vrymoedigheid kan hê wanneer Hy verskyn en nie beskaamd van Hom weggaan by Sy koms nie.

29 As julle weet dat Hy regverdig is, dan weet julle dat elkeen wat die geregtigheid doen, uit Hom gebore is.

Die Gebod om Lief te hê. Die Kinders van Aleim

3 Kyk wat 'n groot liefde die Vader aan ons bewys het, dat ons kinders van Aleim genoem kan word! Om hierdie rede ken die wêreld ons nie, omdat dit Hom nie geken het nie.

2 Geliefdes, nou is ons kinders van Aleim, en dit is nog nie geopenbaar wat ons sal wees nie; maar ons weet dat ons, as Hy verskyn, aan Hom gelyk sal wees, omdat ons Hom sal sien soos Hy is.

3 En elkeen wat hierdie hoop op Hom het, reinig homself soos Hy rein is.

4 Elkeen wat die sonde doen, doen ook die wetteloosheid, want die sonde is wetteloosheid.

5 En julle weet dat Hy verskyn het om ons sondes weg te neem, en geen sonde is in Hom nie.

6 Elkeen wat in Hom bly, sondig nie. Elkeen wat sondig, het Hom nie gesien en Hom nie geken nie.

7 My kinders, laat niemand julle mislei nie: wie die geregtigheid doen, is regverdig soos Hy regverdig is.

8 Hy wat die sonde doen, is uit die duiwel, want die duiwel sondig van die begin af. Vir hierdie doel het die Seun van Aleim verskyn, om die werke van die duiwel te verbreek.

9 Elkeen wat uit Aleim gebore is, doen geen sonde nie, omdat sy saad in hom bly; en hy kan nie sondig nie, want hy is uit Aleim gebore.

10 Hierin is die kinders van Aleim en die kinders van die duiwel openbaar: elkeen wat die geregtigheid nie doen nie, is nie uit Aleim nie, en hy ook wat sy broeder nie liefhet nie.

11 Want dit is die boodskap wat julle van die begin af gehoor het, dat ons mekaar moet liefhê;

12 nie soos Kain wat uit die bose was en sy broer doodgeslaan het nie. En waarom het hy hom doodgeslaan? Omdat sy werke boos was en dié van sy broer regverdig.

1ste MoUse. 4: 4, 8. LXX MT

13 Verwonder julle nie, my broeders, as die wêreld julle haat nie.

14 Ons weet dat ons oorgegaan het uit die dood in die lewe, omdat ons die broeders liefhet. Hy wat sy broeder nie liefhet nie, bly in die dood.

15 Elkeen wat sy broeder haat, is 'n moordenaar; en julle weet dat geen moordenaar die ewige lewe as iets blywends in hom het nie.

16 Hieraan het ons die liefde leer ken, dat Hy Sy lewe vir ons afgelê het; en ons behoort ons lewe vir die broeders af te lê.

17 Maar wie die goed van die wêreld het en sy broeder sien gebrek ly en sy hart vir hom toesluit, hoe bly die liefde van Aleim in hom?

18 My kinders, laat ons nie liefhê met woorde of met die tong nie, maar met die daad en in Waarheid.

19 En hieraan weet ons dat ons uit die Waarheid is; en ons sal ons harte voor Hom gerusstel,

20 want as ons hart ons veroordeel, Aleim is meer as ons hart, en Hy weet alles.

21 Geliefdes, as ons hart ons nie veroordeel nie, dan het ons vrymoedigheid teenoor Aleim;

22 en wat ons ook al bid, ontvang ons van Hom, omdat ons Sy gebooie bewaar en doen wat welgevallig is voor Hom.

23 En dit is Sy gebod, dat ons in die Naam van Sy Seun, IESO die Gesalfde, moet glo en mekaar liefhê soos Hy ons 'n gebod gegee het.

24 En hy wat Sy gebooie bewaar, bly in Hom, en Hy in hom. En hieraan weet ons dat Hy in ons bly aan die Gees wat Hy ons gegee het.

Die Valse Leraars.

4 Geliefdes, glo nie elke gees nie, maar stel die geeste op die proef of hulle uit Aleim is, want baie valse profete het in die wêreld uitgegaan.

2 Hieraan ken julle die Gees van Aleim: elke gees wat bely

dat IESO die Gesalfde in die vlees gekom het, is uit Aleim;
 3 en elke gees wat nie bely dat IESO die Gesalfde in die vlees gekom het nie, is nie uit Aleim nie; en dit is die gees van die antigesalfde waarvan julle gehoor het dat hy kom, en hy is nou al in die wêreld.
 4 Julle is uit Aleim, my kinders, en het hulle oorwin, omdat Hy wat in julle is, groter is as hy wat in die wêreld is.
 5 Hulle is uit die wêreld; daarom praat hulle uit die wêreld, en die wêreld luister na hulle.
 6 Ons is uit Aleim; hy wat Aleim ken, luister na ons; hy wat nie uit Aleim is nie, luister nie na ons nie. Hieruit ken ons die Gees van die Waarheid en die gees van die dwaling.

Om Aleim Lief te hé en Mekaar Lief te hé.

7 Geliefdes, laat ons mekaar liefhê; want die liefde is uit Aleim, en elkeen wat liefhet, is uit Aleim gebore en ken Aleim.
 8 Hy wat nie liefhet nie, het Aleim nie geken nie, want Aleim is liefde.
 9 Hierin is die liefde van Aleim tot ons geopenbaar, dat Aleim Sy eniggebore Seun in die wêreld gestuur het, sodat ons deur Hom kan lewe.
 10 Hierin is die liefde: nie dat ons Aleim liefgehad het nie, maar dat Hy ons liefgehad het en Sy Seun gestuur het as 'n versoening vir ons sondes.
 11 Geliefdes, as Aleim ons so liefgehad het, behoort ons ook mekaar lief te hê.
 12 Niemand het Aleim ooit aanskou nie. As ons mekaar liefhet, bly Aleim in ons en het Sy liefde in ons volmaak geword.
 13 Hieraan weet ons dat ons in Hom bly en Hy in ons, dat Hy ons van Sy Gees gegee het.
 14 En ons het aanskou en ons getuig dat die Vader die Seun as Verlosser van die wêreld gestuur het.
 15 Elkeen wat bely dat IESO die Seun van Aleim is—Aleim bly in hom, en hy in Aleim.
 16 En ons het die liefde wat Aleim tot ons het, leer ken en geglo. Aleim is liefde; en hy wat in die liefde bly, bly in Aleim, en Aleim in hom.
 17 Hierin het die liefde by ons volmaak geword, dat ons vrymoedigheid kan hê in die oordeelsdag; want soos Hy is, is ons ook in hierdie wêreld.
 18 Daar is geen vrees in die liefde nie; maar die volmaakte liefde dryf die vrees buite, want die vrees sluit straf in, en hy wat vrees, het nie volmaak geword in die liefde nie.
 19 Ons het Hom lief, omdat Hy ons eerste liefgehad het.
 20 As iemand sê: Ek het Aleim lief—en sy broeder haat, is hy 'n leuenaar; want wie sy broeder wat hy gesien het, nie liefhet nie, hoe kan hy Aleim liefhê wat hy nie gesien het nie?
 21 En hierdie gebod het ons van Hom dat hy wat Aleim liefhet, ook sy broeder moet liefhê.

Gehoorsaamheid deur Geloof in IESO en die Gevolge Daarvan.

5 Elkeen wat glo dat IESO die Gesalfde is, is uit Aleim gebore; en elkeen wat die Vader liefhet, het ook die een lief wat uit Hom gebore is.

2 Hieraan weet ons dat ons die kinders van Aleim liefhet: wanneer ons Aleim liefhet en Sy gebooie bewaar.
 3 Want dit is die liefde tot Aleim, dat ons Sy gebooie bewaar; en Sy gebooie is nie swaar nie.
 4 Want alles wat uit Aleim gebore is, oorwin die wêreld; en dit is die oorwinning wat die wêreld oorwin het, naamlik ons geloof.
 5 Wie anders is dit wat die wêreld oorwin as hy wat glo dat IESO die Seun van Aleim is?
 6 Dit is Hy wat deur water en bloed gekom het, IESO die Gesalfde; nie deur die water alleen nie, maar deur die water en die bloed; en dit is die Gees wat getuig, want die Gees is die Waarheid.
 7 Want daar is drie wat getuig in die hemel: die Vader, die Woord en die Heilige Gees, en hierdie drie is Een;
 8 en daar is drie wat getuig op die aarde: die Gees en die water en die bloed, en die drie is eenstemmig.
 9 As ons die getuienis van die mense aanneem—die Getuienis van Aleim is groter, omdat dit die Getuienis is van Aleim wat Hy aangaande Sy Seun getuig het.
 10 Wie in die Seun van Aleim glo, het die getuienis in homself. Hy wat Aleim nie glo nie, het Hom tot leuenaar gemaak, omdat hy die getuienis nie geglo het wat Aleim aangaande Sy Seun getuig het nie.
 11 En dit is die Getuienis:

dat Aleim ons die ewige lewe gegee het, en dié lewe is in Sy Seun.

12 Hy wat die Seun het, het die lewe; wie die Seun van Aleim nie het nie, het nie die lewe nie.
 13 Dit het ek geskrywe aan julle wat glo in die Naam van die Seun van Aleim, sodat julle kan weet dat julle die ewige lewe het en kan glo in die Naam van die Seun van Aleim.
 14 En dit is die vrymoedigheid wat ons teenoor Hom het, dat Hy ons verhoor as ons iets vra volgens Sy wil.
 15 En as ons weet dat Hy ons verhoor, dan weet ons dat, wat ons ook al vra, ons die bedes verkry wat ons van Hom gevra het.
 16 As iemand sy broeder 'n sonde sien doen wat nie tot die dood is nie, moet hy bid, en Hy sal hom die lewe gee—vir die wat nie 'n sonde tot die dood doen nie. Daar is 'n sonde tot die dood; daarvoor sê ek nie dat hy moet bid nie.
 17 Alle ongeregtigheid is sonde, en daar is 'n sonde wat nie tot die dood is nie.
 18 Ons weet dat elkeen wat uit Aleim gebore is, nie sondig nie; maar hy wat uit Aleim gebore is, bewaar homself, en die bese het geen vat op hom nie.
 19 Ons weet dat ons uit Aleim is en die hele wêreld in die mag van die bese lê.
 20 En ons weet dat die Seun van Aleim gekom het en ons verstand gegee het om die Waaragtige te ken; en ons is in die Waaragtige, in Sy Seun, IESO die Gesalfde. Hy is die waaragtige Aleim en die ewige lewe.
 21 My kinders, bewaar julleself van die skynbeelde. Amen.